

Gronda fiasta per Vic Hendry

Il scribent daventa burgheis d'honor da Tujetsch



(anr/hh) Il scribent Vic Hendry ei vegnius undraus il venderdis sera dalla vischnaunca da Tujetsch cul premi da cultura. Il medem mument daventa el era burgheis d'honor.

Rodund 200 vischinas e vischins da Tujetsch, mo era amitgs d'ordeifer, han assistiu alla digna festividat per igl autur sursilvan che viva dapi 46 onns a Schaffusa. Il president communal Pancrazi Berther ha honorau Vic Hendry per sia gronda ovra litterara e per siu engaschi nunstunclenteivel a favur dil lungatg romontsch. Dacuort ei il 27avel cudisch da Vic Hendry cumparius, el porta il tetel «Miu plaid scol suer digl izun». Il scribent che ha saviu festivar igl onn vargau il natalezi da 85 onns ha prelegiu sez il venderdis sera ord quel. Cun occasiun dalla festividat ha Vic Hendry regalau alla

vischnaunca da Tujetsch sia biblioteca privata sco era ina custeivla collecziun da vischala.

Scriver ei ina gronda consolaziun

Vic Hendry retscheiva il premi da cultura e daventa burgheis d'honor da Tujetsch

(anr/hh) El rom d'ina varionta festividat ha la vischnaunca da Tujetsch honorau il venderdis sera siu convischin Vic Hendry. Per sia gronda lavur sco scribent e siu engaschi endinau a favur dil lungatg romontsch eis el vegnius undraus cul premi da cultura ed ei daventaus burgheis d'honor. La fiasta ei vegnida enramada d'ina prelecziun, da plaid e da producciuns culturalas. Vischnaunca e Forum cultural da Tujetsch han iniziou la fiasta pigl anniversari da 85 onns da Vic Hendry ella sala dalla casa da scola a Sedrun. «Las fiastas ein da far cu ellas crodan», ha il president dil forum André Schmid puntuau en siu plaid da beinvegni avon ils rodund 200 presents. Il natalezi da Vic Hendry vegni festivaus cun empau retard, mo buca memia tard. André Schmid fa allusiun dallas intenziuns dil forum cultural. Quel sestenti a favur dalla promoziun dalla cultura ed emprovi era da spindrar edifecis historics e da muntada cultura. L'undraziun da Vic Hendry ei vegnida enramada da pliras producciuns dil chor d'affons dalla tiarza e quarta classa primara sut la bitgetta da Marcus Bearth sco era dalla Societad da musica Sedrun sut la direenziun dad Eduard Tuor.

Il 27avel cudisch

Renconuschientscha per sia lavur ha Vic Hendry buca mo retschert il venderdis dils vischins dalla Val Tujetsch, mobein era si dalla Bassa ed ord l'Engiadina. Bruno Ötterli da Dozwil che ha ediu il novissim cudisch «Miu plaid scol suer digl izun» da Vic Hendry enconuscha il scribent dapi biars onns. Denter auter eis el staus collega da lavur da quel a Schaffusa: Vic Hendry haveva buca bia peda per ses collegas. Cura ch'el deva buca scola, scriveva ni ligeva el.» El hagi recaltgau renconuschientscha a Schaffusa oravontut entras sias columnas. Vic Hendry hagi mussau ch'ins sappi emprendre culs onns: «El ei daventaus in excellent liricher.» Quei vegni renconuschiu da biars ed era enconuschents scribents svizzers. Il cudisch «Miu plaid scol suer digl izun» ei vegnius illustraus digl artist sursilvan Matias Spescha e translataus en tudestg. Ina dallas translaturas ei l'Engiadinesa Mevina Puorger Pestalozzi, oriunda da Ramosch, stada. Ella ha caracterisau il venderdis sera la persona Vic Hendry: «El ei staus fideivels a sias ragischs e quei malgrad ch'el viva dapi varga 45 onns ella Bassa. El ei in excellent scribent. Sias poesias ein ina fuorma condensada da quei che l'olma vesa e senta.» Vic Hendry ha prelegiu entginas passaschas ord siu novissim cudisch.

Mintga pass ha ses motivs

Suenter in'activitad da plirs onns sco scolast enteifer la Val Tujetsch ha Vic Hendry fatg il fagot e ha

priu dimora cun sia famiglia igl onn 1960 a Schaffusa. Sia affonza ha el passentau a Cavorgia. «Viver da stretg en in vitg muntagnard ha signau el», di il president communal Pancrazi Berther. La decisiun da bandunar la Val hagi el buca priu mo aschia: «Mintga pass ha ses motivs», puntuescha Berther. El fa menziun dils emprems pass da Vic Hendry sil sector dalla lavur sco scribent. Quels ha il senior fatg ella «Gasetta Romontscha», il «Pelegrin» ed il «Bündner Tagblatt». Paucs onns suenter suondan las empremas atgnas publicaziuns. «Tiu stil ha buca cattau dapertut accoglientscha», constatescha il president communal. Ei suondan plirs cudischs che portan reconuschientscha e premis, denter auter duas ga quel dalla fundaziun Schiller, il premi da reconuschientscha dil cantun Grischun e la fin finala era il premi da cultura dil cantun Grischun. «Probablamein ei Vic Hendry igl autur sursilvan che ha scret il pli bia», di Pancrazi Berther. El seigi vegnius enconuschents cun siu lungatg e cun quel hagi el buc adina fatg semplia la caussa al lectur.

Gronda honor

Per sia gronda ed eccellente ovra e per siu nunstunclenteivel engaschi a favur dil romontsch e dils Romontschs ha la suprastonza communal da Tujetsch decidiu da surdar a Vic Hendry il premi da cultura e da numnar el burghais d'honor. Quella undrientscha ha la vischnaunca concediu entochen oz sulettamein als augsegners ed agl inschignier Bernasconi dalla Viafier Furca Alpsu. Ensemen cun sia consorta Zaria ha Vic Hendry astgau retscheiver las duas distincziuns. «Quei ei empau bia honor», ha el puntuau enviars ils presents. El seigi turbelaus e surprisus. El fussi era bugen daventaus genau, mo persuenter hagi el surprisus l'incarica da cronist. Scriver seigi sco ina consolaziun, mo vegni buca semplamein ord la mongia: «Tgi che seriva ha da soffrir e survegn magari aunc pataheflas.» El seigi adina puspei returnaus ella Val.

Per saver scriver stoppien ins enconuscher la situaziun. «Tujetsch ha ina geografia e historia sco paucs», puntuescha Vic Hendry. Ed el aschunta: «Jeu selegrel dalla honor. Uss eis ei matei da far pulit.» Cün occasiun dalla festivitad ha il Forum cultural era saviu comunicar che Vic Hendry e sia consorta Zaria hagian decidiu da regalar alla vischnaunca da Tujetsch lur biblioteca privata che cuntegn 80 meters cudischs. Vidlunder vegn ina donaziun da vischala fetg custeivla, elavurada a sias uras dil pigner Deragisch da Bugnei. Da quella vischala ha surtut la presidenta dalla cumissiun dil Museum La Truaisch, Barla Monego-Venzin, plascher: «Igl ei sco sch'els havessen regalau quella vischala a mi.» El museum vegn quella a cattar in plaz d'honor.

«Empriu dalla critica»

Quater damondas al scribent Vic Hendry

Cun Vic Hendry ha Hans Huonder/anr discurriu

Sia ovra sco scribent ei reconuschida, siu engaschi pil romontsch ei gronds. Malgrad ch'el habitescha dapi varga 45 onns a Schaffusa ha Vic Hendry manteniu sie relaziun tier la vischnaunca paterna Tujetsch.

Vic Hendry, tgei munta quella honor dalla vischnaunca da Tujetsch per Yus?

Quella honor munta a mi in tschuat. Jeu haiel retschert da quei ch'jeu havess mai spitgau. Naturalmein ch'jeu haiel luvrau bia per la Val, denton quei cheu ei pagau pliras gadag' per mes merets.

Tgei relaziun haveis Vos oz aunc tier la Val e la vischnaunca da Tujetsch?

La relaziun ei aunc adina buna, schebi ch'jeu haiel vendiu quei ch'jeu havevel, pia casa e praus. La buna relaziun ei restada surtut cun ils habitonts. Sch'ins scriva numnadamein dil liug e dalla gliעד, ston ins haver las enconuschientschas necessarias.

Il diember da publicaziuns ei gronds. Danunder haveis Vos priu tonta energia e motivaziun da scriver?

Enqual ga saiel jeu sez buca quei. Jeu havevel l'entschatta in lungatg fetg pretensius ed in grond vocabulari. Persuenter haiel jeu era survegniu pataheflas. Jeu haiel denton empriu da quella critica e fatg vinavon. Enqualga haiel jeu schizun il sentiment ch'ei scrivevi enta memez. Jeu haiel stuiu

sedeliberar, per mei ei il scriver adina staus sco ina consolaziun.

Vegn Vic Hendry aunc a publicar ulteriurs cudischs?

Quei saiel jeu buca dir. En mintga cass vaiel jeu aunc treis ni quater ovras buca publicadas. Quellas vegnan ad esser en miu relasch litterar. Ellas ein enzatgei dil pli custeivel ch'jeu possedel.